

Publication: Berita Harian , p 04

Date: 23 February 2017

Headline: SMU introduces FinTech scholarship

SMU kenalkan biasiswa FinTech

UNIVERSITI Pengurusan Singapura (SMU) telah memperkenalkan biasiswa teknologi kewangan atau FinTech yang bertujuan mengenal pasti dan mengembangkan bakat FinTech Singapura akan datang.

Biasiswa berjumlah \$180,000 secara keseluruhannya yang disumbang oleh PayPal bertujuan menyokong pelajar yang ingin mengkhusus dalam bidang teknologi kewangan, keselamatan siber atau analisis perniagaan.

Enam pelajar dari Sekolah Sistem Maklumat SMU akan menerima geran biasiswa \$30,000 seorang setiap tahun bagi tempoh tiga tahun.

Biasiswa pertama akan dianugerahkan kepada dua pelajar pada separuh pertama tahun ini.

Antara kriteria yang dikenakan bagi mereka yang ingin memohon termasuk penglibatan dalam aktiviti kokurikular, serta minat yang mendalam terhadap teknologi kewangan, keselamatan siber, pembayaran, serta analisis data.

Tawaran biasiswa ini berikutan peningkatan kurikulum SMU Oktober tahun lepas sebagai respons kepada perubahan teknologi, jenis pekerjaan dan juga permintaan pasaran.

Bersama dengan peningkatan kurikulum ini, pelajar kini mempunyai lebih banyak fleksibiliti mempelajari kemahiran teknikal yang mendalam atau mengimbangi antara kemahiran teknikal dengan perniagaan, serta mewujudkan penyelesaian pengkomputeran dan maklumat yang inovatif bagi perniagaan dan juga masyarakat.

Semasa dihubungi, pengurus Besar Pusat Pembangunan PayPal Singapura, Encik Anupam Pahuja, berkata dalam tempoh perkhidmatan kewangan pesat berubah, industri FinTech perlu terus membangunkan bakat yang dapat menawarkan penyelesaian yang lebih mudah, selamat dan cekap.

"Kami percaya inovasi merupakan pendorong pertumbuhan ekonomi yang kukuh dan perlu digalakkan sebelum seseorang itu melangkah ke alam pekerjaan. Satu-satunya cara inovasi gangguan boleh dihidupkan adalah dengan mengenal pasti dan mengembangkan bakat muda dan PayPal berharap memainkan peranan dalam memupuk generasi bakat FinTech akan datang," ujarnya.

Dekan Sekolah Sistem Maklumat SMU, Profesor Pang Hwee Hwa, berkata:

"Biasiswa dari PayPal ini, yang juga merupakan pemimpin industri dalam penyelesaian pembayaran dan juga Fintech, merupakan pengiktirafan kepada usaha inovasi dalam penyelidikan dan pendidikan sekolah ini.

"Dengan biasiswa ini, pelajar akan diberi peluang turut serta dalam menghasilkan penyelesaian FinTech dengan pusat penyelidikan kami, dan juga melalui latihan sambil bekerja dengan PayPal."